

## KITABU MA KWONG'ANE PA MUSA

# THANGAMBERE

*Maram Mungu Cwio ko Ng'om ku Dhanu*

1 Ku kwong'a Mungu cwio polo ku ng'om. 2 Man ng'om ubedo umbe ayi man mananu; man mudho bedo wi wang' longro: e Tipo pa Mungu riebri wi wang' pi. 3 Man Mungu wacu kumae, Dong' der ubed nuti: e der ubedo nuti. 4 Man Mungu neno derne, nia e ber: e Mungu poko der ku mudho. 5 Man Mungu lwong'o der Ceng', e mudho elwong'o Diewor. Man uthieno nuti kugweno de nuti, ceng' acel.

6 Man Mungu wacu kumae, Dong' apokapiny ubed i kind pi, man epok kind pi ku pi. 7 Man Mungu timo apokapiny, e epoko pi ma yo ther apokapiny ku pi ma yo wi apokapiny: e ebodo kumeca. 8 Man Mungu lwong'o apokapiny Polo. Man uthieno nuti kugweno de nuti, ceng' mir arionde.

9 Man Mungu wacu kumae, Dong' pi ma ni the polo cok dhoge i kar acel, man dong' ng'om m'uthwo woki: e ebodo kumeca. 10 E Mungu lwong'o ng'om m'uthwone Ng'om; man cokri mi pi ke elwong'o Nam: e Mungu neno nia e ber. 11 Man Mungu wacu kumae, Dong' ng'om utwi lum, man uboko ma cego nyinge, ku yen ma ju nyinge ma cego nyinge ku kite ku kite, ma nyinge nuti i ie, wi ng'om: e ebodo kumeca. 12 Man ng'om utwio lumbe, kud ubokone ma cego nyinge ku kite ku kite, ku yedhi ma cego nyinge, ma nyinge ni i ie, ku kite ku kite: e Mungu neno nia e ber. 13 Man uthieno nuti kugweno de nuti, ceng' mir adenge.

14 Man Mungu wacu kumae, Dong' der gibed nuti i apokapiny m'i polo kara gipok dieceng' ku diewor; man dong' gibed ni giranyutha, man ni oro ku cwir, man ni ceng' ku rundi: 15 man dong' gibed ni der i apokapiny m'i polo kara gicar ng'om ku der: man ebodo kumeca. 16 E Mungu timo der ario ma dongo; der ma dit ubim dieceng', man der ma nok ubim diewor: etimo cero bende. 17 Man Mungu kethogi i apokapiny m'i polo kara gicar ng'om ku der, 18 man kara gibim wi dieceng' man wi diewor, man kara

gipok der ku mudho: e Mungu neno nia e ber. 19 Man uthieno nuti kugweno de nuti, ceng' mir ang'wende.

20 Man Mungu wacu kumae, Dong' pi pong' kud udul giracwia ma kwo, man dong' winyo giring i ng'om wi apokapiny ma thwolo m'i polo. 21 Man Mungu cwio yedi ma dit m'i nam, man giracwia ma kwo kubang'e kubang'e ma wothe, ma pi pong' kudo, ku kite ku kite, man winyo kubang'e kubang'e ma jubombe, ku kite ku kite: e Mungu neno nia e ber. 22 E Mungu mio mugisa igi, ewacu kumae, Wunyol, man wumedru, man wupong' pi i nam, man dong' winyo medre i ng'om. 23 E uthieno nuti kugweno de nuti, ceng' mir abije.

24 Man Mungu wacu kumae, Dong' ng'om unyol giracwia ma kwo ku kite ku kite, lim, ku gin ma lak i ng'om, man yedi m'i ng'om ku kite ku kite: man ebodo kumeca. 25 E Mungu timo yedi m'i ng'om ku kite ku kite, man lim ku kite ku kite, man ku ba gin ceke ma lak i ng'om ku kite ku kite: e Mungu neno nia e ber. 26 Man Mungu wacu kumae, Dong' wati-mu dhanu kud ayiwa, ku kitwa: man dong' gibed ku kero wi rec m'i nam, man wi winyo m'i polo, man wi lim, man wi ng'om ngung', man wi gin ma lak i ng'om kubang'e kubang'e ma lak wi ng'om. 27 Man Mungu cwio dhanu kud ayine gire, i ayi Mungu ecwie; ecwiogi nico ku dhaku. 28 Man Mungu mio mugisa igi: man Mungu wacu igi kumae, Wunyol, wumedru de, wupong' ng'om, man wudwoke wor iwu; man wubed ku kero wi rec m'i nam, man wi winyo m'i polo, man wi gin ma kwo kubang'e kubang'e ma wothe wi ng'om. 29 Man Mungu wacu kumae, Nen, amio iwu uboko ceke kubang'e kubang'e ma ju nyinge, ma ni i wang' ng'om ceke, man yen ceke kubang'e kubang'e ma nying' yende ni i ie ma cego nyinge; ebibedo iwu ni cemo: 30 man ni yedi m'i ng'om ceke kubang'e kubang'e, man ni winyo ma kor polo ceke kubang'e kubang'e, man ni gin ceke ma lak i ng'om kubang'e kubang'e, ma igi ju kwo, amio uboko ceke ma numu kubang'e kubang'e ni cemo igi: e ebodo kumeca. 31 E Mungu neno gin ceke m'etimo, man, nen, e ber dit. Man

uthieno nuti kugweno de nuti, ceng' mir abusiende.

**2** Man polo ku ng'om gidaru timbri, kud udul pinje ceke. <sup>2</sup> Man i ceng' mir abirone Mungu daru tic pare m'etimo; man eyom i ceng' mir abirone ni tic pare ceke m'etimo. <sup>3</sup> Man Mungu mio mugisa wi ceng' mir abirone, man edwoke leng'; kum eyom i ie ni tic pare ceke ma Mungu cwio man etimo.

**4** Maeni thek piny m'i polo man m'i ng'om kinde ma jucwiogi, i ceng' ma Yehova Mungu cwio ie ng'om ku polo. <sup>5</sup> Man yen moko mbe m'i thim ma fodubedo nuti wi ng'om, man uboko moko mbe m'i thim ma fodutwi; kum Yehova Mungu fodukonjo koth ungo wi ng'om: man ng'atu moko mbe ma timo tic i ng'om; <sup>6</sup> ento thoi idho malu kud i ng'om, man ekonjo pi wi wang' ng'om ceke. <sup>7</sup> Man Yehova Mungu cwio ng'atu ma nico kud utur m'i ng'om, man eyuyo lietho mi kwo i ume; e ng'atu ma nicone doko ni ng'eyong'ec ma kwo.

#### *Podho Aden*

**8** Man Yehova Mungu thego podho yo nyangu, i Aden; man eketho ng'atu ma nicone m'ecwio keca. <sup>9</sup> Man Yehova Mungu ketho yen ceke kubang'e kubang'e utwi kud i ng'om ma nyayu mutoro i wang', ma ber de ni cemo; ku yen mi kwo bende i die podho, man yen mi ng'eyong'ec mi gin ma ber ku gin ma rac. <sup>10</sup> Man kulo ai i Aden kara umi pi ni podhone; man ku keca epokre, man edoko ni wipi ang'wen. <sup>11</sup> Nying' ma kwong'ane Picon: en e maeni m'utiekio ng'om dho mi Havila gbur, ka ma mola ma kwar ni i ie; <sup>12</sup> man mola ma kwar m'i ng'om maeca e ber: man kidi ma kwar ni keca ku kidi ma ju kite. <sup>13</sup> Man nying' kulo mir arionde en e Gihon: en e maeno m'utiekio ng'om dho mi Kuc gbur. <sup>14</sup> Man nying' kulo mir adege en e Hidekel: en e maeno m'ukadhu yor i wang' Ascur. Man kulo mir ang'wende en e Frati. <sup>15</sup> Man Yehova Mungu gamu ng'atua, man ekethe i podho mir Aden kara etim tic i ie ekure de. <sup>16</sup> Man Yehova Mungu ng'olo ni ng'atua, ewacu kumae, Ku ba yen ceke m'i podho icopo camu kume moko calu ijenyo: <sup>17</sup> ento yen mi ng'eyong'ec mi gin ma ber ku gin ma rac, kud icam nyinge moko: kum i ceng' m'ibicamu nyinge moko ci e ibitho andha.

**18** Man Yehova Mungu wacu kumae, E ber ungo nia dhanu bed kende; abitimo

ire jakony. <sup>19</sup> Man Yehova Mungu cwio yedi ceke m'i thim kubang'e kubang'e ku ng'om, man winyo ma kor polo kubang'e kubang'e; man ekelogi ba ng'atua kara enen maram ebiwong'o kogi: e nying' ma tek ng'atua lwong'o ko gin ceke ma kwo kubang'e kubang'e, e ebodo nyinge. <sup>20</sup> Man ng'atua mio nying' ni lim ceke, man ni winyo ma kor polo, man ni yedi m'i thim ceke kubang'e kubang'e; ento ni Adamu junwang'u jakony ungo ire. <sup>21</sup> E Yehova Mungu ketho nindo ma pek unuro ng'atua, e enindo; man ewodho wel ng'ete acel, man eculo ring'o kakare: <sup>22</sup> man wel ng'ete, ma Yehova Mungu wodho kud i ng'atua, etime ni dhaku, man ekele ba ng'atua. <sup>23</sup> E ng'atua wacu kumae, Maeni cogo mi cogona, man ring'o mi ring'kuma: jubilwong'e Dhaku, kum juwodhe ku ba Nico. <sup>24</sup> Ka kumeno nico biweko won ku min, man ebimoko kum cege: man gibidoko kum acel. <sup>25</sup> E gin ario gibedo muneru, ng'atu ma nico ku dhaku pare, man lewic unegogi ngo.

#### *Dhanu Podho i Dubo*

**3** Nwang'u thwol riek ma sagu yedi mange ceke m'i thim ma Yehova Mungu cwio. Man ewacu ni dhaku kumae, Meno te, Mungu wacu kumae, Kud wucam kum nying' yen ceke m'i podho? <sup>2</sup> Man dhakune wacu ni thwol kumae, Kum nying' yen m'i podho wacopo camu: <sup>3</sup> ento kum nying' yen ma ni i die podho, Mungu wacu kumae, Kud wucam kume moko, kadok amula de kud wumul kume, wumaru tho. <sup>4</sup> Man thwol uwacu ni dhakune kumae, Wubitho andha ngo: <sup>5</sup> kum Mungu ng'eyo nia i ceng' ma wucamu kume moko, e weng'wu biyabre, man wubibedo calu Mungu, ma wung'eyo ko gin ma ber ku gin ma rac. <sup>6</sup> Man ka dhakune neno nia yen ubedo ber mi cemo, man nia enyayu mutoro i wang', man nia juketho cwiny kum yende kara udwok jo riek, egamu kum nying' yende, e camu; man emio ni cware bende ma ni karacelo kude, e camu. <sup>7</sup> E wang'gi yabre gin ario de, man ging'eyo nia gibedo muneru; e gikwoyo ith uboko, gitimo ni kendi igi gigi. <sup>8</sup> Man giwinjo dwand Yehova Mungu ubewo tho i podho i kinde ma yamu mi dieceng' ukoto: man ng'atu ma nicone ku dhaku pare gipondo gigi ni wang' Yehova Mungu i kind yedhi mi podho.

**9** Man Yehova Mungu lwong'o ng'atu ma nicone, man ewacu ire kumae, Ini